

西江視臬紀事

西江視臬紀事卷二

定遠

詳議

設牌勸繳羅經詳

會議得邪教不除則人心不正最爲地方風俗之累江省愚民惑於邪妄信從大成羅教及一切左道異端汨沒沉淪已非一日馴至黃森官傅秀山等糾黨倡逆滋害地方雖屬奸民自罹法網端由司牧教戰無方是以正俗維風必在勸懲有法仰蒙憲檄飭行查議務絕此風并飭議各處建立

齋堂可否毀塞外來異言異服之人作何驅遠本
城居民作何勸諭改邪歸正殷殷下詢敢不悉心
妥議以副 憲懷遵行南昌府轉據南新二縣逐
加核議詳覆前來本署司等覆加確核竊以人心
即好異信邪未始不怵刑畏法第漸染既久狡黠
者異於倖免愚蒙者陷於不知就使誥誡頻仍地
方官不過奉行故套照式謄錄揭之通衢究亦未
必家知戶曉查師巫邪術律禁甚明應將各條律
例逐一摘出並將奉 憲查禁緣由刊刷簡明告
示貼於高脚木牌每里給牌一面令保甲肩牌沿

門傳諭令有收存大成等教經卷者概行呈繳取具悔過甘結悉照自首免罪於法既為不擾而教令可以徧及本署司現在另擬示式即發各府轉飭照刊務使窮鄉僻壤及有棚民處所一體傳知徧傳之後即將示牌豎立保長之家如有破損許其稟縣另給俾之觸目警心庶幾改行從善亦教先於刑之意也又城郭通衢以及遠僻鄉壤或有設立齋堂聚集匪最為滋害若令召民買頂則仍為民業未免址宇猶存愚頑未化若招居僧道更難必其盡屬良善竊以此項創建之費無非奸

民醵歛之資建設既為違例以法即應入官應飭各縣除在通衢大鄉即改作講約公所外如孤僻荒村遇有經堂即行拆毀木料磚瓦造冊另存以為公事修建添補之用仍飭各縣將所屬有無經堂責令保甲具報不得濫差衙役沿鄉滋擾如保甲有隱匿不報及以僧道廟宇混稱經堂捏害者按律究處亦清源過流之一道也至外來異言異服之人所在多有設立保甲本以稽查匪類相應一并責令保甲嚴查凡菴堂寺院歇店等處如有容留來歷不明之人保甲一并懲處至星相藝卜

律所不禁苟非行踪詭秘不得槩事混挈則奸宄可懲而地方不擾矣至本地居民作何化導改邪歸正之處查各鄉設立約長俛日宣講

聖諭廣訓原以化導愚頑無如各縣視等具文其實心奉行者究為無幾應飭各州縣遵照雍正八年奉行條議實力遵行勤于宣布庶幾漸仁摩義不難易俗移風矣本司等更有請者收繳羅經查察齋堂業經屢示嚴飭而各屬猶有報繳未盡者請自此次通飭之後限以三月邪經務盡收繳經堂務盡查毀即取具該地方官查禁盡絕印結由府加

結轉申倘結報之後仍有私習大成羅教及藏匿
大乘羅經并私立齋堂事發者除本犯及保甲隣
佑照律治罪外即將該地方官照例叅處合并詳
請核定以便轉飭遵照

酌設救火器具并專員督理議詳

會看得烈焚肆燄雖曰天灾捍禦有方端由人力
必其籌備於平時庶不周章於臨事前以章外居
民不戒於火荷蒙 憲臺親詣救護得未延燒隨
時熄滅茲復以督率無紀撲救乖宜人力既有不
齊器具亦多未整開列條規殷殷下詢仰見 憲

臺軫念民瘼詳求備禦之至意遵經行據南昌府
議詳前來本司等覆加酌核查奉議建立號旂以
備使令一條竊以事功雖憑群力而趨止宜合一
心倘猝遇不戒倉惶群集苟無所統何以責成應
如該府縣等所議嗣後各營縣帶領兵役救火應
派令頭目一名執旗前導旗首懸小燈籠二盞書
明某營某縣字號以為標認一切指縱該員弁即
令執旗頭目擺旗為號以為兵役進退之節至文
武官員督率兵役撲救又宜派定名數分別文武
衙門委員督領以專責成查 憲標左右兩營向

派勇健兵丁各五十名鎮標前營派目兵二十名
後營派目兵四十名專司救火今請照舊派定各
委本營守備率領撲救其文員查南昌府并同知
南新二縣各衙門原派救火快壯各三十名通判
十二名亦應照舊派定分管率救一體分置號旗
燈籠等項仍令文武衙門將派定兵役造具花名
清冊以四分之二備管機桶擠水如地方窄狹機
桶難施另置截筒每兵一把以便施放尚餘二分
以一半專司奔走挽水一半專司拉扯房屋以開
火路但火警事起一時兵役散處猝難傳集查議

派兵役二百九十二名救禦火災原在勇練而不
在衆多並請各衙門兵役分作三班以兩班當值
一班輪替十日一次更番輪換則聞警立赴無倉
猝傳喚之勞仍令兵役各製小木牌一面白粉黑
字書明衙門姓名懸帶腰間救火時武員當令中
軍稽查文員專委南昌府同知稽查如有當先用
力者記名格外獎勵其兵役不齊救援不力者分
別究處如此則應撲應拆悉應機宜而合力合心
功歸畫一矣至火勢方熾撲救不及時以拆斷火
道為救火第一善法但草瓦雖去椽柱仍存無異

益薪實如 憲諭誠宜添設大斧大鋸并榔頭雲梯等物以資拆卸設立號鑼以齊人力亦應如該府縣等所議除營中原有額設木匠四名外南新二縣應設官匠各四名并酌添大斧八把鋸四張木榔頭四個分給各匠遇有火警隨官聽用仍與兵役一例看旗聽號以一趨止如有廣廈巨屋棟柱堅牢將屋內前後上下穿枋先用榔頭斷其關節則榻架無所附麗加以斧砍鋸鑿兵役即用雲梯上屋搭錨聽鑼為號鑼止齊拉勢無不倒火道既斷火勢自殺所拆不過數間而所全實多其拆

毀房屋仍計開數與燒毀者一體優卹俾小民咸知利害所在亦自無阻滯矣至二縣添設木匠雖火警原屬間有但事起一時必宜預備乃為無患伊等既稱官匠勢難自便應請每名每年量給工食銀六兩于藩庫公項動支救火之後仍同兵役一體量賞其應添斧鋸榔頭等項所費無多應令該二縣先為捐置以備急需至拉錨之緯止用麻繩恐火燎易斷前截應用鉄索六七尺後截接以麻緯方為適用統計需置十四副分給文武各衙門每二副并另置雲梯六張不湏甚大每張止以

可上二人為度使寬狹地方均可通用飭行該府
同現在一應救火器具有應添補者一體查明添
置其鉄錨雲梯即于派定救火兵役內擇人帶管
救火時仍衆力並舉再木匠鋸鐮枋柱將傾之際
兵役人等即上房搭住鐵錨拉扯此上房搭錨之
人出力蹈險當屬首功應比各兵役加倍獎賞以
示鼓勵者也又奉議挑水人夫宜預為派定一條
查蓄水備火不易良規但先事之防原以備臨時
之用今十家置桶貯水咸滿而挑運無人究為虛
設誠宜預定挑水人夫以收實效但該府縣所議

亦尚有可議者如編造冊籍分甲分段既開需擾
之端置桶置籌赴官請烙亦滋守候之累且本甲
失火則甲內之家免挑本段失火則段外之家免
挑倘失火之家正在甲末段尾又將何以派別火
烈而久則需水必多旋起即滅則需水必少今若
定以每家五担倘遇有不敷又責何人挑運况失
火之所人多擠塞一段若干甲一甲若干家交水
交籌解然雜沓更為嘈亂而挑運斷續不繼尤失
事機本司等再四思維查保甲烟戶各縣原有成
冊今止將本城內外原編保甲抄送該同知存查

不必另行查造該同知按冊傳示甲長每甲置備水桶五担籌十枝寫明某甲某人限日置備該同知隨到隨烙凡有火警不論本甲別甲除失火處所上下五家免其挑水外其餘上下甲每甲各出五人一體挑運其水前甲即挑後甲木桶所貯之水轉入救火處所水桶內後甲復挑其後甲木桶所貯之水轉入前甲水桶內似此轉相灌注源源不絕遇有河井池塘之處而止查城外多近江干城內亦多塘井大約上下以五甲為率其間挑運者約五十人至火場者十人每人挑運相去不過

十家之地聲息相應紛繹轉注可無斷續擁沓之患其稽查之法查運水交籌雖足以杜混冒但倥偬之際呼吸機宜交水查籌既滋錯亂况挑運俱係大桶之水挹彼注此若欲交籌是每一大桶邊即須一人查收甲長衙役既不可信而官負又不能分身稽查徒滋雜沓無益事機應請交水時免其交籌專令兩縣縣丞分管上下率同甲長往來催督五人挑水止在十家之內亦覺易于稽查倘人數不敷或貯水不繼即將甲長責懲火既熄滅挑水之人各將水籌繳該縣丞收繳該同知稽考

則法不擾而民不勞蓄貯挑運咸有實際至挑運
灌注責之民夫引送潑用責之兵役各執其勞自
無混冒惟機桶頗大省會街道窄狹之處勢不能
容反滋擁塞應于聞警擡赴時先于寬廠處所安
置相度取用如有不便專用截筒合力以援事功
立集矣又奉議乘機搶奪宜嚴查究一條查救災
卹患風俗斯美乃江省民人遇事則競逐閑觀填
街塞道絕無出力救援之人其間不法之徒更敢
乘機搶奪笈法喪良於斯為最此風不戢必致奸
宄之徒乘風縱火公行搶奪為害滋多除章江門

外失火搶失器物現在飭縣嚴拿務獲究處外今
應仍如該府該營所議文負委該府同知多帶健
役巡緝查拿武員差外委一員協同查緝仍飭臨
時有競逐閑觀擁塞道路者槩行驅逐庶奸徒知
所歛迹而災民免遭重禍矣又奉議救火器具宜
修葺增添一條查救火全資器具器具不整人力
何施誠宜不時查點預籌添補除向未置備之斧
鋸榔頭為費無幾飭縣捐設以備急需外其議設
號旗燈籠喇叭銅鐸截筒亦係向未置備之物需
用不時急宜預製應令該府查明應需數目酌動

公項迅飭置備以便遇警應用其餘先經設備之
大桶小桶火鈎蔴搭雲梯機筒等項雖現有應用
之物其間何者應添何者應修未據該府查議應
請並飭委員會同該二縣迅速確查逐一核議估
造清冊另詳報核以上各條似於救災禦寇之道
實有裨益應請亟行以副 憲臺軫念民瘼之至
意又該府詳據該二縣議請將各條事宜刊刷多
張教導兵役之處查紀律既申器具咸備兵役人
等若不通曉于平時必難奉行于倉猝應如該府
縣所請將所議規則遵候核定後摘叙簡明條教

刊刷多張分給兵役俾于操演點卯時互相講習
則融會於平時自可遵行於臨事矣又據該府縣
議請遴委專員查脩火具一條查各項火具原分
各衙門收貯其間殘缺短少難保必無應俟此番
通查添補修整之後文負衙門委該府同知武員
衙門移營委員每季查驗一次冬季每月查驗一
次如有損壞短少查係救火損失官為脩補如係
收貯不如法致有損失即着落收貯衙門修補其
各保甲分貯大小木桶尤為切要仍需責該同知
不時查驗并飭大桶貯水務滿毋致淺涸則稽查

經管各有專責而有備無患矣又據該府縣議請
在省火神宜設祀典一條按禮能禦災捍患則祀
之我

皇上敬大勤民敦崇禋祀凡所以柔懷百神福佑黎庶
者靡不備舉矧祝融司火見諸史冊今各省民人
雖崇廟貌而虔奉祀但春秋祀典未奉特設可否
俯如該府縣所請援照天后祠之例

題請設祀查明省城原有祠宇擇其規模宏敞之處
動項脩葺以肅觀瞻以崇禋祀庶明德薦馨而神
庥永護矣以上三條均屬有裨禦備合并詳議伏

查得各屬詳報被失各案前因賊賊每多不獲率
由捕役庇縱所致是以設立稽查提比之法又因
捕役中或冒名代解或衆捕幫費催覓打點弊竇
叢生復經嚴飭稽查在案嗣據署新城縣知縣張
秉彝通詳請于解比捕役時造具年貌清冊并用
硃書臂膊以杜冒替詳奉 憲臺批司妥議行據
建昌府議覆前來本司覆加確核竊以捕役于解
比時造具年貌清冊並送雖足備臨時查察然狡
黠經捕又何難將催覓之人年貌開入仍不免有
頂替之弊應令州縣於每年開印後先將捕役姓

名年貌面目疤痕造冊呈報廳府司道查核於解
比時又於此內註明年貌面色查冊驗批再對本
身面色如有不符即係頂替除將冒替之人重懲
外仍嚴提正身從重懲處則頂替之弊可杜矣又
據稱將捕役硃書臂膊以杜中途冒替一條查油
硃書寫姓名原可做效迨催募應比後而以正書
正役赴縣查銷事仍無益查各縣捕役既于未解
之前造有年貌清冊存查又于臨解時照冊查明
填註文批嚴行驗對自可杜奸該縣所議油硃書
臂之處應毋庸議又據該府議稱胥捕之玩縱固

當究懲而于上緊緝獲之捕役亦應量子獎賞等語查賞罰明而後勸懲立捕役綦縱有罰跣緝不力有罰果有實心緝拿以清積案者自宜量加優獎以昭勸典應如該府所議嗣後飭令各州縣造具各經承捕役承緝各案已未獲四柱循環總冊中送各上司查核按季倒換自本年冬季為始如一季之內該經捕全獲者除該縣給賞外上司俱給賞銀牌記功示獎緝獲過半者該縣給賞緝獲十之三四者免比一次緝獲十之一二案者解府道查比全無弋獲者令該府究明綦養情弊解司

嚴比仍將該犯家屬收禁勒緝似亦飭捕清件之一法也是否允洽伏候 憲裁

議建昌府條陳保甲詳

會議得安民莫先于弭盜戢奸而弭盜戢奸莫善于編查保甲此固不易之經凡有民社之責者亦無不悉知者也然行之苟有未善則紛紜煩擾良法美意反為滋弊之端仰蒙 憲臺洞鑒其源殷殷告誡誠業已至詳至盡前奉檄行遵即通飭各屬一體凜奉循保甲之良規絕棚長之需擾務洗積習實力稽嚴外今據建昌府條議請添設保甲族

正并申連坐之條嚴稽查之法等欵具詳前來奉批會議本司道等遵即細加會核一據詳建屬五邑每里惟設有鄉保一人另設各項頭役雜辦諸務凡分發滾單理處詞訟無不責之鄉保牌甲無暇顧問請僉誠實公正之人充應保正甲長其餘地方一切細務查處查覆俱令向設之鄉保改為鄉長承值等語查十戶為甲設一甲長十甲為保設一保正原以責成約束稽查奸匪今建郡各屬既止鄉保一人並無所謂保正甲長則其編立保甲亦止戶給一牌而已顯屬有名無實至所稱各

項頭役雜辦諸差既非 令典尤為濫設應行該
府嚴飭各屬編次保甲務遵定例每甲每保另僉
誠實公正之人充應甲長保正專司稽察地方逃
盜人命賭具賭博私宰私鑄開窩窩匪等事此外
一切不得干預務遵成典實力奉行倘有陽奉陰
違及奉行不善煩擾滋弊者即以奉行不實詳揭
請叅仍將所設各項頭役查明是何名色所辦雜
差是何差使嚴行禁革以杜弊援至該府所稱改
設鄉長承查事件之處查地方詞訟剖斷曲直責
在長吏批發鄉保原屬地方陋習蓋鄉保中公平

正直者無幾同屬鄉里未免各庇所親曲直是非
豈無偏蔽地方官怠于問斷輒擅批行陽托省事
之名陰長欺朦之弊不知地方佐雜尚不得批理
民詞豈容混批鄉長致滋弊竇但鄉長一役即屬
耆老應飭地方官僉擇安分醇謹之人照舊設立
耑司講約勸導之事詞訟內果係口角細故及田
債不明細事發令調處如有不服處息者即令鄉
長喚回原被當堂回繳地方官立時剖斷省釋以
免差擾其餘一切槩不得因循陋習混行批查如
此則保甲之實效可收而地方之陋習可除矣一

據詳保甲牌頭責司稽查請飭各屬將逃盜私鑄
邪黨騙拐賭具賭博窩園開窩凡律應連坐牌隣
保甲者俱開列應問罪名及應行獎賞各款刊印
頒掛俾甲內之人觸目提撕等語查保甲人等率
屬鄉民一切事犯若不將賄隱失察應得罪名擒
拿舉首應得獎賞預行曉告則勸懲之道茫乎不
知何以責其實力稽查急公首報應如該府所議
通行各屬將保甲牌隣例應稽查各項事件遵照
律例逐一開載賄隱失察應得何罪擒拿舉首應
得何賞何者應坐隣佑何者并及保甲條分縷晰

刊刷小示頒給保正甲長於門首張掛俾一甲居民咸知警惕而保甲牌鄰曉然於責守所在亦將實心承辦自不敢復仍隱蔽之習矣一據詳江右風氣大都聚族而居賢否不一其間容有別姓要亦無多斷難令一族自聯牌甲致相徇隱亦不得不責成族衆互相覺察請有聚族同居者照常編甲擇甲內之別姓以充甲長再於通族中遴選族正董率族人等語查江右風俗聚族而居所在多有保正甲長即係族人固難保其不無徇隱但別姓既寥寥無幾若令充甲長則每年僉點更替

無人勢致一二異戶長川充役似非所以均勞逸而便民情也况保正甲長雖係族人既已在官則職役為重原不得復循親屬容隱之律應請仍飭一體編排輪流充應如徇隱事發異姓同族一例究擬不少寬貸則公私攸別而勞逸可均至設立族正久奉定例誠恐各屬有不能實力奉行未免日久弛應請通飭各屬如地方村庄聚族滿百人以上揀選族中人品剴方素為閭族敬憚者立為族正若有匪類令其報官究治倘徇情容隱與保甲一體治罪務照定例遵行可也一據詳府州

與州縣最親見聞難掩請飭府州其各屬編查保
甲或有未協多方指示查點稍懈時加訓飭當盤
查下縣之時就便親臨查察按季取結加轉等語
查知府為州縣親臨之官考覈最親見聞最切事
無大小均有督率稽查之責例應不時查考應如
該府所議請通飭各府查所屬內編查保甲或有
未協則多方指示或有疎懈則時加訓飭或遇下
縣盤查經過村庄關鎮就便查察果能實力奉行
按季取結加具府結申由該道核轉倘有視為故
套遵行未善立即詳揭知府狗庇該道察揭則督

率振勵事歸實在自不敢視等具文矣以上四條
本司道等細加酌核實於舉行保甲之法有所裨
益統候核定通飭各屬一體遵照取具遵依示
式另繳是否有當伏祈憲鑒批示遵行

議糧道條陳佐雜分查保甲詳

查看得糧道詳議編查保甲分令佐雜辦理並選
擇保正甲長牌頭一案奉憲臺以佐雜未免營
私殷戶又多圖脫何以期其盡善批行本司等妥
議等因仰見憲臺端本澄源安民弭盜之至意
本司等遵查欲清盜源莫先保甲良法美意至詳

至備而行之終鮮實效者固因地方官視等具文
行鮮實力亦由庶政繁多不能專務也至保正甲
長即古嗇夫黨正閭胥比長本非賤役然舉得其
人則察惡勸善苟非其人則暱惡比奸欲求實效
則不得不重責任欲重責任則不得不嚴選擇此
糧道分辨選舉之議實亦救弊良圖也惟是佐雜
中不盡實力奉公之負未免以夫役紙筆之資徵
員無出借端科擾而保正甲長牌頭每邑動需千
計按年報替一邑之中又豈得如許端正殷實之
平民而使之允應此端一開正恐濫舉混板此推

彼卸告訐成風反以滋擾况江省保甲多屬輪充
在殷實端慤之人惟恐受累視為畏途百計圖脫
其頂役者非受賄頂替即奸猾鑽充平時則營私
包隱事發則托故巧避其秉公舉報者百不得一
是有選擇之名而無選擇之實誠不可不預為詳
求也本司等再四籌畫竊以縣丞典史巡檢均有
地方之責

朝廷設官分職分應協辦以襄奔走逐里編查實應
責成分理但伊等身任編查奔馳點驗跟隨夫役
則需日食之資造冊給牌則需紙筆之費若不為

之預籌未免藉口有詞此原係地方官應辦事件
應令地方官量行捐給仍於縣書內派撥繕書二
名給與紙筆跟隨造冊編造之法一如定制州縣
時加稽察仍令督捕之同知通判總轄稽查倘佐
雜等員稍有籍索即行嚴揭至保正甲長牌頭仍
循江省舊規唯擇素無過犯之人挨戶輪充免其
選舉以杜營免鑽充之弊惟輪應充當者槩不得
托故避免亦不得受僱頂充蓋挨戶輪充成規久
具人知不可倖免自將安分充應雖有奸徒無從
恣詐濫報混扳之弊既除則勒詐牽累之端自少

雖未必盡能得人苟有干犯繩之以法地方官無所曲貸伊等敢不奉公即佐雜等員沿門查點按戶給牌無紛更之擾無舉擇之權亦將無所庸其營私滋擾矣餘悉照該道所議以收實效是否允協理合會詳 憲臺俯賜查核批示以便移會分管之糧道通飭各屬遵行

竊案通報議詳

查得崇仁縣孟令詳請賊少竊件年終彙報一案奉 憲批司查議遵經行據撫州府詳覆前來本署司覆加細核據議均為未協竊以竊盜滋害地

方最為民累况小民所有不過米穀布帛雖所值無多倘致被失其情更迫其患滋深豈容因其賊少遂行忽視故盜無強竊賊無多少例應通報凡以重盜也若以賊數多寡分別通報彙報是以賊為重而以盜為輕以賊多素裕之家被竊為當急而以賊少貧素之家被竊為可忽矣况江省各縣習於廢弛地方被失一報之外便為了事即如現在通報竊案各屬不下數十餘起甚或多至一二百起飭緝催緝提比捕役何等綦嚴各縣承緝賊賊尚且百無一獲而昏庸州縣任捕牽鼻諱匿時

聞玩縱不少若再免通報止報本府則除本府以外上司既無稽察州縣別無顧慮捕役則益肆養縱竊盜則益無忌憚開州縣諱匿之端貽民生竊擾之害均非所以弭旱竊而安民生也今該縣以愚民多捏竊冒賊之弊請免通報不知捏竊冒賊自有定律豈容因此廢法以爲竊在民該縣不行通報又何以使民不致受其害耶即據該府詳稱賊至二十兩以上者即至二十兩以下皆不報矣現在一切竊案賊至二十兩者有幾况各縣估賊率多不實多少既得任心即至二十兩以上亦

何難減其數以自便至云竊犯至三名以上通報
尤為未協事主初報到官竊盜幾人憑何預知又
豈能逆料其數而分別報與不報乎至謂免其通
報可省案牘之繁不知州縣責在寧民而寧民莫
先弭盜今但欲省此一紙報文置民間竊害於不
顧地方亦安賴有此昏惰之吏查該縣地方失竊
頻聞杳無弋獲今又混請免報厥心之竊盜但知
苟且自安全不為地方振刷該府並不留心細核
率請照詳均屬不合今請除人賊並獲之案仍照
舊報府核轉外其餘一切竊案一體通報倘有諱

匿照例詳叅將該縣府所議贓少竊盜免其通報之處毋庸議可也緣奉批議事理是否允協詳候憲臺核奪批示遵行

請嚴洗筋之禁議詳

查得贛俗惑於風水凡父母死故塋後一二年輒將棺骸起出洗其筋骨驗其紅黑以別吉凶如紅即以棕包裹仍塋原地否則遷移別處逾年仍行檢視俗名洗筋又曰檢筋恠毒瀾天恬不為怪雖士庶之家亦或不免查律載卑幼發五服以內尊長墳塚開棺見屍者斬又子孫毀棄祖父母父母

死屍者斬立法何等恭嚴以父母之遺骸博子孫
之富貴已非有人心者所忍出乃該屬惡習忍將
父母已葬之棺屢起骸骨任意洗滌殊駭聽聞雖
律無正條似此殘忍惡薄即律以開棺見屍及毀
棄之罪尚有餘辜但愚民錮蔽已深固知律例若
遽繩以嚴法似為不教而誅應請將卑幼發掘尊
長墳塚開棺見屍及毀棄祖父母父母死屍各應
得罪名并嗣後有犯即照此律治罪之處先令地
方官明白出示曉諭勸戒並於朔望宣講

上諭時一并痛切開導仍着各約練保甲族鄰人等不

時稽查一有違犯即令報官嚴拿并究地師通詳
飭審按律治罪倘練約人等容隱不報查出并究
仍令按季出結送縣存案庶愚頑之徒各知儆畏
而洗筋惡習可以漸除不特安死者於九泉亦以
全生命於三尺也應否如是理合詳候核示飭遵
香屯戴村地方設立浮橋委撥員弁彈壓堵

私議詳

會看得德興縣香屯地方切近婺源為浙私出入
之總匯河道寬濶水勢湍急梟徒順流衝越小民
貪賤食私積弊相沿已非一日雖經議設巡商然

寥寥丁役阻遏要衝緩之則有勾私賄縱之弊急之則有抗官滋事之虞究屬有名無實應於香屯地方設立浮橋以資堵禦但建設伊始啟閉盤查未有定制兵役仍易滋奸梟徒不無翫法離縣既遠知縣勢難兼顧應請于該府就近所屬內委令佐雜一員崙司彈壓一年一換實為有裨再查樂平縣之戴村亦為私販聚集之地今香屯雖設浮橋然灘陡水急難免透漏並請移撥千總一員駐于戴村以資巡哨仍令各該縣多撥兵役協力防嚴則奸販侵透之弊可杜而引目無塵滯之患矣

再香屯地方原設止巡丁八名今啟開浮橋水陸
巡查實屬不敷據該商稟請添募似應准其增募
十二名俾敷查緝所有造橋工費及添設巡丁工
食并各員盤費居住屋租等項據該商稟請援照
現支巡費之例在於屯船充公項下支給但屯船
公項本司道衙門無案可稽應移運司酌撥給商
領辦理合一并詳明伏候 憲臺批示移飭遵行
請開鼓鑄勤稽緝并隣邑協緝族保約束條

議

竊查利弊有相因之勢民風有澆厚之殊積弊不

除則利端不舉奸民不化則風俗不淳故懲奸剔
弊實為成俗利民之先務本署司謬膺司臬視事
三年土俗民風留心體察敬就所知及事宜應行
者為我 憲臺陳之

一宜請鼓鑄以杜砂廢也查江省各屬民間行使錢
文惟撫建廣贛南等府行使大制錢其餘各府俱
用小錢而砂廢剪邊公行換和本署司履任後稔
悉其弊痛加察禁頗極諄嚴又一面督令所屬先
後訪拿剪毀錢邊之向庚生等七犯私造鉛錢之
尚鼎臣等三犯換和砂廢之毛秀昇等十二犯又

親然謝埠等村訪茲陳韋先等六犯從委員查獲
孫繼明等二犯俱按其情罪重則詳

題輕則究結以期根除弊絕又恐罔利奸民玩法不
改復經刊布條約開明律例遍頒通示仍製備傳
旗大書條禁給發七門內外保甲週而復始挨舖
曉諭俾知懲創實已不遺餘力方覺弊風稍戢然
而愚罔無知之輩畏法之念終不勝其逐利之心
稽查稍懈則乘隙復萌禁戢過嚴則錢價滋長錢
文最切民用一旦價值高昂又與貧民未便故力
行查禁之中又不得不籌及便民之計今欲清其

源以過其流必使錢文充足乃可絕弊止奸查江
省現收黃銅器皿約已二十萬斤應請即將此銅
循照雍正八年規例

奏請開爐鼓鑄搭放餉食經費俾之流通廣裕民用
既充則錢價不慮其昂而砂廢剪邊可以稽除淨
盡矣

一宜考功過以勤緝賊也從來竊盜不除民難安枕
江省濱江帶水之區稽防嚴密強劫之案真為間
有兩年以來止鄱陽縣報劫一起業經獲盜審

題惟鼠竊之風各屬多有以南昌府之南昌新建豐

城等縣撫州府之宜黃崇仁金谿等縣建昌府之
南城南豐新城等縣袁州府之萬載萍鄉等縣贛
州府之信豐寧都會昌等縣報失尤多蓋南昌地
當省會五方雜處而撫建袁贛毗連閩楚粵界山
區遼遠間錯湖民稽察稍難亦其地使然也本署
司屢飭各屬勤嚴保甲以稽積匪先後訪獲積匪
巨窩楊聚等六起又訪獲掏摸積匪劉苾兒等二
十八起分別詳究又因各屬報竊頻聞報獲無幾
復經詳定比捕之法亦未始不為嚴切然總覺報
多獲少者比捕之法止嚴捕役而印捕各官失竊

之案例無年限處分苟非勤幹之員踈忽怠漫均所不免應請飭行各縣設立功過簿一本每月將地方報失幾件獲賊幾名徭行開列於次月初申送查核發填除報少獲多者准其功過相抵外其報多獲少及有報無獲者分別案件多少緝限遠近輕則記過重則請叅則功過聿昭而州縣咸知儆勉矣

一宜定鄰邑協緝之勸懲以嚴踈縱也地方官獲賊究出窩夥未必盡為同邑倘隸別屬例移原籍地方官查緝而本籍印官多以事在別邑漫不經心

不過循行故套出一票差一役而已不知積賊捕
役原為一氣串通恭蔽何弊不為遂至不拿不獲
置之高束迨至彼邑屢催或奉上飭提則以緝無
其人一語混覆塞責而竊賊已深潛遠遁江嶺已
獲竊案窩夥未齊成年不結率由于此雖經本署
司屢檄申嚴并詳定一體提比經捕而各邑究以
事非切已仍不免官弛役弊應請酌定勸懲之法
通飭各屬凡係隣邑關拿賊犯於文到日即行差
拘限五日移解果能即獲者本籍地方官准予記
功緝獲之捕役即令失事之邑酌量案件捐銀給

賞如果緝無其人即取具族保甘結於十日內移
覆彼邑如逾限不獲或混稱無獲後經彼邑捕役
仍在本籍地方拿獲賊犯者除提本籍捕役確究
秦縱實情外即將本籍地方官以縱賊叅究則鄰
邑無敢膜視而正賊不致漏網矣

一宜嚴族保約束之責成以杜聚鬪也江省民俗蠻
野徇小利而昧大義雖至親家戚錙銖必較睚眦
必復又多群居族處各為黨比每以小忿輒糾多
人執持兇械居然對壘輒至殺傷雖互戕多命亦
恬不為怪推究其原曾無深仇積怨大抵地基墳

界偶有未清水道蔭塘偶有未溥其值最微其事
甚小而悍焉不領忘身鬪狠本署司每當讞牘深
察其由誠示諄諄不啻再四又恐愚夫愚婦習俗
難移復將五刑圖刊布各屬以期觀感而不逞頑民
端名曰五刑圖刊布各屬以期觀感而不逞頑民
聚衆互鬪之風尚未盡戢竊以族正有約束之條
保甲有稽查之責互毆之家爭地爭墳分塘分水
以及一切起釁之端彼此雀角必有其漸且糾衆
赴鬪事非俄頃族尊保正理無不知果能約束於
平時稽查于先事何難即為解紛即有强悍不遵

亦可稟官究治宜無不戢無如族尊鄉保視同秦越事前則縱惡長兇全無顧慮事後則裝聾作聩膜不相關江省薄俗所在皆然良可鄙恨應請嚴飭通示嗣後地方凡有聚眾爭角俱責成族尊鄉保約束勸諭如兇徒不遵約束即刻稟官拏究倘族尊鄉保仍前漫不管束致成人命者即將族尊鄉保照知人謀害他人不行勸阻又不首告律杖一百即不知情亦坐以失察照不應重杖仍令各縣將責成約束之處刊刷小示遍發城鄉村落一體諭知庶族保知所凜遵而兇徒不敢橫恣矣以

上四條頗闕地方切務本署司既有所見敢不晰陳以仰副 憲臺殷殷下詢之虛公是否可行伏唯 憲臺採擇施行

婦人有犯除死罪免監免解詳

會查得寧州通詳婦女有犯軍流徒罪免其羈禁一案奉 憲批司會議遵經行據南昌府議覆前來本司等覆查律載婦人犯罪除犯姦死罪收禁外其餘雜犯責付本夫或有服親屬收管是一切雜犯軍流徒罪原不槩禁姦罪特禁者以其庶耻已失不復恤之也但近奉

特典姦及和誘例應枷號者亦槩准免枷收贖所以維持風教實已至詳至厚則婦人雖犯姦拐罪惟一杖似應推廣

聖朝欽恤之仁免其羈縲囹圄之苦應請俯如州府所議嗣後凡婦女有犯除雜犯軍流徒罪原非應禁外其犯姦及和誘者於到案時該承問官即行查明免其羈禁着令親屬保領聽候審結發落如有脫匿等弊着落保領根究至於解審之處查明果關緊要案情必須對質者酌量並解其餘供招已明情罪已定者概免解審以省拖累仍于文內聲

明可也緣奉飭議事理是否妥協相應會詳 憲
臺核奪批示以便通飭遵照

棚民編保及禁緝私鹽議詳

會查得德興縣金令詳陳棚民編保及禁緝私鹽
一案奉 憲臺批司會議遵經檄行饒州府查議
去後今據該府議覆前來本司道等會查如金令
原詳棚民添設甲長一條查雍正三年六月內

戶部議覆前督憲查 安輯棚民一案疏稱南昌
等府現在棚戶照編保甲之例稽查并令棚戶五
家互結責成山地主并保甲長造冊具結彙送該

州縣據冊稽查等語遵奉在案是棚民原應照編保甲今該縣既稱棚民七百餘戶散處各都相隔遠近不等僅一棚長實難稽查應令將山場附近棚民無論幾戶聯為一甲添設甲長責令稽查舉首仍照保甲之例編造門牌懸掛則保伍相聯而稽查自易矣又據詳請將各棚就其現住之都編入該都民戶冊尾統歸該都保正管轄等語查原奉部議前督憲查疏內原有派歸都畜一例當差之語自應將各棚戶就其現住都畜編入冊尾統歸保正管轄另立甲分以別土著責令保正

一體稽嚴毋使異民生來出入及容留面生可疑之人其舉首徇隱均照保甲之例分別懲忿則土異攸分而事昭畫一矣又據詳棚戶有滋事不法者舉報究懲後即遞解回籍等語查原奉部議凡有棚民之州縣編查定例之後有續到流移即驅逐出境不得容留其現在棚民有願回籍者聽其回籍冊內將姓名開除不許徃來自由等因是驅逐出境者惟指續到流移而言苟或住居年久置有產業則原籍已無寸土有犯即解轉致播流似非安全之道應如府議酌其情罪必須遞解者

查明該犯產業照依時價估變令其當堂立契頂
賣移回安插毋使復至其過犯尚輕者照律發落
免其押逐其有自願回籍者應令報官記檔除名
不許來往自由致滋事端若因省視墳墓止係暫
時回籍者原在不禁之例但既回籍亦應令其報
明存案以便查察則去住有稽而防維益密矣又
據詳棚民入籍二十年以上者移入民籍刪除棚
戶冊名等語查 部議內稱棚民入籍二十年以
上置有產業墾有墳墓者應聽其入義學讀書五
年後許報明該地方官准其應試于額外的量取

錄造冊報部等因是入籍滿限必令其肄業義
學額外取錄則不便遽刪棚籍可知今該縣欲將
入籍二十年以上之棚民即移入民籍將棚戶冊
名刪除與例不符應仍留棚戶冊名以憑查察年
滿照例肄業臨時酌量取錄則爭端可杜而倖進
可免矣再該縣詳稱縣屬香屯地方與江南徽州
府婺源之小港接界小港本係荒僻邊都而奸商
群聚廣開浙鹽官店四十餘鋪以致樂邑戴村洛
口等處愚民圖賤越販衝入香屯是鄰境官店實
為該縣官民之累請咨查婺源額引確數委員駐

劉設簿將每日挑過鹽觔數目小販姓名售銷處
所逐日登記報縣查察等語查婺邑小港既處邊
界開張四十餘店誠為附近奸民越販之端但香
屯地方業已設立浮橋委員彈壓專司啟閉稽查
并於戴村地方移駐營弁防守堵截該地方官苟
能實力巡察奸販自難透漏婺邑本食浙鹽小港
本係婺地開設鹽店並未越界似未便防其透漏
而禁及鄰省應設之官店况江浙應銷額引均屬
裕課疏商自宜各守各界應令嚴督負役弁兵務
於要隘實力稽查查察既嚴縱使彼處店廣鹽多

人代賠殊多擾累相應并毋庸議又隔屬訟師請
飭移提解究生監有犯分別請革一款查地方詞
訟之繁多由訟棍教唆最為民害是以例禁甚嚴
徇隱即干降調是承審地方與原籍之官均有稽
拏之責或有徇庇之例已嚴自應照例辦理毋庸
更立章程至貢監文武劣生挑唆詞訟例應革究
但所犯有大小情罪有輕重自應臨時酌定分別
詳視亦無庸預設革條致滋煩牘應將該縣所請
貢監生員唆訟分別詳革之處亦毋庸議緣奉飭
議事理是否妥協合候批示飭遵

刁訟拖累完糧積弊臨春奪耕議詳

會查得樂安縣孫令條陳請嚴刁訟拖累錢糧弊
端并禁臨春奪耕等款奉 憲臺批司會議遵經
行據撫州府議覆前來本司等覆查江右民俗刁
悍好訟喜爭以小事架大題以風影為實事任意
織羅牽累無辜及至准理票拘不遵投審或蔽匿
要證或臨審自逃經年累月案懸莫結被告枉罹
牽累守候無期而彼則曳尾揶揄自逞得計蚩蚩
愚氓何堪陷累江省奸民惡習實有如該府縣所
稱今該縣請以原告不到即訊取被告確供將原

詞註銷發看立案等語查定例凡告言人罪不即赴審輒行脫逃者除將被誣證佐俱行釋放外脫逃犯人獲日所告之事不與審理仍以誣告擬罪則原告藏匿原有嚴例但臨審時或有實因抱病或有事他出不能赴審者似當區別應如該府所請嗣後凡有司自理詞訟遵照現行事例於二十日審結懸牌之日如原告及案內要證或因陡患疾病或以要事外出不能赴審者許該家屬將不能赴審緣由據實稟明并取保鄰甘結備案即令被告證佐各歸農業俟原告要證校到再喚審訊

尙原告別無事故並不呈明臨審逃避及指使要
證藏匿意在拖累被告者即將到案之被告干證
不必取供照例釋放將所原告原詞立案不與審理
原告到案仍坐以誣告之罪庶奸徒無所施其施
陷而黥訟可息矣再徵糧陋弊雖久奉禁草火耗
粟錢火工列有明示但告示刊掛櫃所及銀匠舖
面而納戶輸將入城農務倏忙既恐無暇細閱且
半多不識字義閱亦茫然以致奸胥猾匠仍得陰
行其術額外苛求誠未可定應如該縣所陳仰請
通飭嗣後凡納戶輸將於執照印串頭上用一戳

記開明每兩止收加一火耗及收書票錢每票幾
文銀匠火工每兩幾文此外不許多索一一載明
截內使納戶接票到手一目瞭然在鄉里愚民既
簡而易行而奸胥猾匠亦無所施其詐騙矣再小
民終歲之計全在春耕乃江右風俗每多於臨春
之時或藉歲租不楚起田自種或因田土膏腴謀
奪頂耕不顧原佃已費工本雖栽種正殷輒敢毀
種牽牛強行奪踞甚有力不能敵聽其橫奪而於
禾稻將登之際糾衆搶割甚至兩不相下釀成人
命實為惡俗亦應如該縣所陳仰請通飭嗣後民

間凡應起田自耕及另行俵佃者務於隔冬彼此
言明經眾退耕立約存執方許起田倘有不遵或
佃戶逋租霸耕或棍徒謀頂奪耕臨春毀種牽牛
秋成糾眾搶割者分別首從嚴行律擬則主佃咸
知法紀臨春奪耕惡習亦可斂戢不行矣緣奉批
議事理是否允協理合會詳 憲臺鑒奪批示以
便通飭遵行

鄉約設立夜巡并局閉孤廟路亭申嚴店簿

議詳

會查得貴溪縣條陳各款奉 憲臺批司會議詳

奪等因就經移行遵照去後今據廣信府議詳前來本司等覆加查核如鄉鎮設立夜巡一款查各邑遠鄉村鎮既不能皆有柵欄又乏支更巡夜則鼠竊潛行自無顧忌查同鄉同井原有守望之義應如所請無論村庄大小每甲輪流一人俾之擊柝鳴鐸週行巡走遇有形迹可疑之人即扭交地保解官訊究其紳衿之家亦必派出奴僕巡守不得覲免惟實係鰥寡孤獨家無餘丁者無許勒派倘地方遇有失事該地保即將是夜輪巡姓名查確列入報呈以憑查察倘地保有藉端派累滋擾

者查出重處庶地方益加寧謐而宵小更知斂戢矣又孤廟路亭置門扃閉一款查外來奸匪每多假裝乞丐日則在於村庄以求乞為名窺探人家門戶夜則歇宿孤廟路亭恣行攫竊實由孤廟路亭無門闕閉所致但村鄉孤廟所在多有槩令鄉保設門未免攤派槩令地方官捐製又覺費繁且一經官設即為官物損壞遺失反恐滋累查鄉村寺廟果為里社正神及香火庵寺自有僧人住守其無常住而倒壞至無門扃閉者自非應祀正神應請飭令地保逐一查明或行堵塞或行拆毀凡

外來流丐均嚴行驅逐不許容留則匪丐自無所
托足至路亭為行人往來歇肩之所大抵均無關
扁但鄉村既設夜巡自可一例稽查而宵小亦無
自竊發應將該縣府請於孤廟路亭設門關扁之
處毋庸議又歇店設簿稽查一款查歇店設立循
環印簿登註行客姓名每月赴縣倒換如離城遠
者就近赴巡檢衙門倒換定例遵行已久但鄉村
宿店多係村民開設或憚於登填怠於倒換徒有
領簿之名而無稽查之實甚至遠鄉僻店竟不設
簿登填留宿之人奸良莫辨查察未周更所不免

應如該府所請再加嚴行申飭凡歇家行店與夫
遠鄉宿客之飯舖務須設立循環印簿據實登填
歇客姓名年歲籍貫住址按月倒換離城遠者仍
赴巡檢衙門倒換毋許遺漏沉擱遇有遠來隻身
並無行李貨担察其形像可疑不得混行容留如
歇店飯舖不實力查察容留外匪與開填不實匿
不領簿者查出並行究處仍嚴飭各縣凡店家領
簿務須精察毋許胥役勒索借端留難如有故違
嚴行詳究該管本官失察一體揭叅廢店舖不致
畏縮恪遵倒換而地方益得寧謐矣以上各條本

司等逐一酌議是否允協會詳 憲臺核奪

一保甲團練議詳

會查得長寧定南雩都等縣詳陳保甲並團練之法一案奉 憲臺批司會議仰見 憲臺弭盜防姦靖地衛民之至意遵經行據贛州府議覆前來本司等覆查編查保甲一案屢奉 各憲嚴飭奉行其編查之法稽考之方歷有成規至為詳盡江右所屬已經挨戶編查刊刻門牌將本戶姓名年歲丁口籍貫生業一一開註其畸零小戶聯入附近甲內地方印捕各官每年挨戶查點清保伍之

條嚴連坐之律凡有來歷不明及面生可疑之輩
固無駐足之地則保甲之法各屬行之已有成規
但使遵行罔懈自將日見乂安至定南縣詳稱保
正每月赴縣具結一次及寧都縣詳稱保正甲長
選擇家有恒產為鄉評推服之人充應之處雖亦
為慎重保甲起見但各鄉離城遠近不一里民亦
貧富賢愚不等若定以一月一結則離城寫遠之
區每月往返動需四五日反不免有奔走守候之
累而一縣之中僉點保正不下數百僉點甲長不
下數千亦安得有如許有恒產而為鄉里推重之

人使之充應轉不免有彼此推諉放富差貧之弊
應飭保正止於每季通結一次而保正甲長止擇
安分謹慎之人充應則戶無擾累而保正得人矣
至團練之法查江右惟贛南等處間有行者其餘
各屬原不概有今若概行設立江右地方遼濶即
以一邑而論設立鎮村鄉勇至少不下數百則通
計設立團長不下數十既責以董率操演勢難令
其枵腹辦事合計通省需費浩繁州縣既無閑項
可給司庫亦無公項可支而按戶點充亦覺煩擾
滋累况團練一役原以本地居民團護本村鄉里

即古守望相助之義則鄉勇團長惟應聽民自便似毋庸官為挑選亦毋庸議給工食總之保甲之法奉行已力則宵小自可潛踪良懦自能安枕應如該府所議惟在力行保甲庶事不更張民易遵守而工食亦無庸拮据矣至零邑詳稱一甲之內每夜輪派巡夫五人巡查等語查村庄有大小不一民居有多寡不同豈能湊集百家五人輪派查各村於每夜派二人查巡已於進賢縣條議案內詳奉准行在案應將該縣所請設立巡夫五人輪巡之處毋庸再議可也本司管見如斯是否妥洽

統候 憲臺查核示行

夜巡副役等款議詳

會查得進賢縣條陳各款奉 憲批飭會議就經
行據南昌府議詳前來本署司道等覆加酌核除
稽查保甲必須協辦之員一款先據糧道條陳業
經本署司等核議詳覆通飭各屬遵照在案毋庸
再議外如責成夜巡以弭盜源一款查村居民戶
零整不一通族子姓多寡不同若必責以按戶出
丁常川輪值倘遇丁口孤單疾病外出有餘者或
可僱代而力食貧民未免苦累至稱地方如有失

事即將巡夜之人先責二十之處查夜巡雖以稽
嚴盜賊然一時踈失多緣過誤今不問輕重槩予
重懲是匪賊尚弋獲無期而良民反先受拘拏訊
責之累不特失時廢業擾及無辜更恐不肖捕役
乘機嚇詐滋弊無窮是本欲衛民適以病民也應
如該府所議嗣後每夜止派二名輪巡倘有失事
分別量懲以儆怠忽庶法簡而易遵可收夜巡之
實效矣又詳請設立副役一款查幫差白役久奉
革除豈便每名添設副役使之藉差多事况既稱
副役例無工食差遣盤費伺候飯食又出何所止

恐需擾之弊甚於正役如果地方衝劇役不敷用
自應遵例詳請酌增豈容違例濫添應將該縣請
添副役之處毋庸更議又書役遇事需索刁民借
端翻控宜立法預防以除積弊一款查奸役刁民
無地不有需索翻控在在皆然惟在地方各官防
閑慎密聽斷虛公則衙蠹無高下之權自將歛迹
訟棍憚精明之照何敢施奸若如該縣所請無論
刑名錢穀戶婚田土雀角等事臨審之時先向原
被證佐查訊書役有無需索情弊取結附卷不知
事未審結書役即有需索原被亦不敢指陳迨既

審結又何從察問是猶不揣其本而齊其末也立法殊為未善應如該府所議毋庸置議又鄰封庇犯不鮮一欵查一應逃盜竊匪窩賭窩娼命盜等犯如有竄入隣境例得一面差役徑拏一面關會協緝倘隣境庇犯不鮮自應詳揭處分今該府雖稱既經專關鄰境自必實力查拿即或無踪亦必具文交役賁覆寧敢延擱故縱自蹈嚴譴等語但江省各屬遵例協拿者固多而漠視隣境事務屢關不覆一任書差恭縱朦蔽者正亦不少此欵應如縣議立限密拿通飭各屬毋許泄視可也又自

盡命案照小竊詳結一款查自盡人命如果驗訊
並無別故原許詳明立案毋庸復審其或尚有疑
竇未明自應照例先報再加詳審由府詳司核轉
未便照人贓並獲之小竊一面驗報一面詳府核
轉致啟率混之弊至於一切命案一面照例驗報
自應一面即行確審從無必須上司批轉始行覆
審之例此皆冗闊有司藉口積習歷經通飭應飭
照例遵行毋庸再議又限地安葬一款查江省風
俗惑於風水侵佔盜葬固所不免若無論祖墳古
塚均不許在四丈之內安葬或無力之家僅有祖

墳左右丈尺餘地或止分數已山又與他姓墳塚毗連既不敢違法埋葬又無力另購別地反有停棺之虞且啟爭阻之漸實非挽弊之法應如該府所議嗣後本支子孫附葬祖塋者止許於祖塚之下并左右兩旁安葬不得越葬塚頂及貼近墓前其價買別姓之山及已山內逼近他人墳墓并古塚絕塚酌量地勢或於丈數外或二丈外均許埋葬不必定拘四丈以外若係先賢并職官墳墓仍照定例步數丈尺空留不許侵佔庶民情順而告爭之風亦可少戢矣又口典契賣一款查江右陋

習凡典當產業俱寫賣契浮開價值惟於尾後註明實在典價字樣固屬朦混但江省典當產業原有大賣契賣之分大賣者所開均係實在價值永遠絕賣不許回贖契賣者所開價值則係折扣虛數限年回贖仍於契後批明典當實數限滿取贖者依實數歸價若未至年限而回贖者即照虛價還銀俗沿已久人已相安今若嚴行禁止在典業者以為不遵舊例恐未滿年限即行取贖未免退縮不前貧民急於需用又不得不仍立賣契希圖急售誠恐為富不仁之人反得藉為口實混行欺

賣反滋訐訟之端應如該府所請仍從俗便毋庸
更張惟註明實在典價之處應令該縣通行出示
俱於契內年月之前登註以免裁割之弊至於投
稅之時止須查其是否大賣賣契尾後有無裁挖
虛實即可立辨不必傳訊原業致滋擾累又隣私
充斥請設法巡查一款查江省鹽政各府州縣雖
經定有引額然例係通融疏銷故僅於省會設立
總店發給小販零星運賣今若令于各邑設立小
埠自行售賣在商人設店僱人徒多一番費用於
鹽政仍無裨益而零星小販既無旗鹽運販勢必

販私漁利是欲杜私者造所以益私也至於緝私之法已奉 各憲籌畫周詳惟在實力奉行自無鄰私充斥之弊亦應如府請均照舊例遵行毋庸再議以上各條本署司道等逐一酌議是否允協詳候 憲臺核奪

關提人犯懲治訟師事主捏贓等款議詳

會議得分宜縣條陳關提人犯懲治訟師事主報贓等款奉 憲批司會議本司守覆查據該縣詳陳關提人犯鄰邑徃徃任催不解應飭一體嚴拘限日移審其有實係在逃一時難獲者先將難獲

緣由移覆仍一面比差務獲如兩月後仍無犯解
聽發覺之縣分詳府司移捷等語查隔屬關提非
係要犯卽屬要證鄰邑准關自應卽時差拘移解
庶犯證不致遠逃而事件得以速結原不容有所
岐視無如各屬狃於積習徃徃視非切務漠不關
心一任經捕延捺及至屢催始以境內並無其人
草率一覆便爲了事以致現犯拖累案件稽延深
屬玩習應如府請照本司從前條陳鄰邑關拏賊
犯之議再飭各屬嗣後凡遇鄰邑關提一應案犯
於文到日卽行差拘限五日內移解其有實係在

逃一時難以拘獲者亦即取具族隣具結於十日內移覆仍行立限勒拘再如不獲徑詳府司飭提如有逾限不覆及混獲情弊列經差獲即將混覆之官輕則予以記過重則詳報請叅庶使積玩之習稍知懲剔亦清釐案件之一法也又詳陳民間訟習不除多由訟師唆使鄉民被誘罹法伊則置身局外預行躲避請將一切詞訟務將做狀人姓名開列詞後并拘聽審如有捏誣同原被并究再犯倍處三犯枷責等語查一切詞訟原恐小民不諳書寫是以考立代書令其據事直書印戳詞後

倘有增減誣妄即指名拏究原以杜刁訟之端無
如好訟棍徒率聽訟師愚弄憑私誣妄明識虛情
止希從准迨水落石出猶信奉不疑寧甘反坐而
不肯將做狀之人供出不云過路算命之人則稱
不識姓名撞遇之客雖嚴究訟師歷奉定例而究
出懲治者百不得一應如府議通飭各屬嗣後凡
一切詞訟務將做狀之人姓名住址開列詞後有
不遵者概不准理若審係情真自毋庸拘審倘審
有教唆誣妄情弊即提拏到案按律懲治仍記檔
案再犯加等倍處庶唆告之訟師不能脫身於事

外而聽惑之愚民亦免受愚矣于掌中矣至該縣所請三犯枷責之虞查教唆詞訟律與犯人同罪其罪并有重於枷責者似不便預定枷責之條應將所請毋庸議又該縣詳陳事主被失報賊每多虛冒致案久懸請飭凡獲賊到案如供認之賊與事主原報之數多少不符者將賊犯嚴加刑訊若經兩次刑訊而賊犯堅供如故者許承審官即照供認之賊追擬詳結其刑訊賊犯之時務喚事主面審庶使退無後言等語查事主冒開贓物固所不免而黠賊狡供匿賊亦屬時有總在該縣虛衷

確訊虛實自明今若定以賊犯兩經審訊茹刑不
承即照認賊追擬完結既恐奸匪積賊希圖匿贓
或蠹捕中飽嚇使狡賴甘茹刑法始終不承而有
司急圖結案憚于詳求反足滋濫刑朦混之端誠
屬未便至賊犯供認竊贓與原報不符者應令於
傳喚事主認賊之時就便質明亦不必事主面審
以滋拖累應將該縣所請刑訊賊犯務喚事主面
質之處亦毋庸議緣奉飭議事理是否有當伏候
核奪批示以便通飭遵行

雜職委署佐貳不許相驗并佐貳錄供議詳

委佐貳而代驗之員必係同知通判州同州判縣丞等官毋得濫派雜職等語是典史巡檢等官原無相驗之例惟佐貳或因差委事故其員缺有委巡典等官署理者遇有地方人命正印公出鄰邑寫遠或六遇公出伊等因現署佐貳遽行相驗亦所或有不知伊等雖暫署佐貳究為雜職官職卑微前赴屍場相驗不但不能彈壓且恐吏件藐玩致滋弊端而屍親無所懾服兇犯轉恣狡展徒使日後承審之員有費周章誠有未便應如所請嗣後正印公出佐貳亦因差委事故係巡典暫署者

遇有命案發覺無論真正人命及自盡等案應令
署佐貳守官仍飛移鄰近州縣或鄰近佐貳星赴
相驗填格通詳毋許署佐貳之巡典筆員違例徃
驗以滋奸弊再人命重情全憑落膝初供定例佐
貳驗明傷痕填具格結通報仍聽正印官承審等
語原令佐貳不許承審並非禁其不許錄供若既
經相驗而一切犯證槩置不問恐正印公出日久
訟棍乘機串捏供情藉口狡賴反致弊竇叢生倘
未取供之兇犯于收禁後病斃則不取緊要口供
更干例議況查江省具報人命每多刁健屍親藉

屍牽誣本屬鬪毆動稱謀故叢殺羅織無辜更或
意在圖詐釋貧噬富將無干之人列為首犯其下
手正兇開作餘人反致正兇兔脫轉輾牽累他如
數人共毆其原傷之輕重下手之先後皆為案情
要鍵若俟正印回署推究更恐串捏狡飾案情失
實亦應如所請嗣後該佐貳相驗之時應酌案情
輕重如實止投河自縊毫無關碍等案徑飭填格
通報俟正印回署審詳如係真正人命應令該佐
貳於屍場究別正兇摘取緊要口供叙入通報文
內分別正犯餘犯酌量監保如有正兇要犯逃逸

立即遴差拘拿務獲仍嚴飭毋許借端滋擾如此則獲兇之案既免日後周章其未獲兇犯亦不致因循兔脫似於命案有益是否有當相應詳候察核示行

平錢價禁祠本嚴霸種條議

查得遵奉 憲檄諮詢地方利弊以襄治理仰見憲臺保乂為懷勤求民隱之至意本司才識疎庸謬膺風紀之重凡闔地方利弊悉心體訪已歷六年竊見江省民風淳簡率儉成俗常茲 憲節初移百度澄清之候實無大利可興大弊當草唯民

情所急習俗未移所當整理者謹就所見條列如左

一錢價日昂民用日絀急宜籌劑也竊惟利用便民莫如錢幣年來各省錢文俱稱昂貴然或專用大錢或大小兼行尚可疏通惟江西之南瑞袁臨南康饒九等七府歷來行使止係小錢而大錢向未兼行從前小錢每千易銀不過六錢適年日見騰踊漸增至一兩五六分民用益乏貧民生計益艱而奸利之徒因之換和砂廢嚴法以懲非不暫止而錢價轉增禁戢稍寬乘隙復起而換行猶是將

來錢不加多勢必日耗日貴其為民困究於何底
本司再四圖維竊以欲平錢價首在錢文充裕欲
使錢文充裕必使大小兼行江省既不行大錢而
又非經商巨賈聚集之區故大錢之流通絕少即
欲令民間兼配亦無大錢可行且現在小錢之價
等於大錢價既不勻民用亦多未便故欲使小大
兼搭必宜官為開鑄得錢數十萬串然後明立章
程酌定大小價值兼搭行使則大錢之流通有自
而小錢之價值可平但欲開鼓鑄必須籌畫銅斤
洋銅採辦不易唯滇銅日旺然泉府皆所取給

果否得有餘銅可以採資鼓鑄或將滇省現鑄錢
文酌撥數十萬串解江開厥酌定價值換給民用
收價解滇還項應請移商滇省撫憲倘可酌劑一
時取請

奏明辦理本司實見江省錢價日昂平減無自近日
民情無有急于此者伏唯 憲臺念切民瘼用敢
直陳其槩尚祈採擇

一公祠收積訟本之俗宜禁也江省聚族而居者皆
有祠堂有祠堂即有公產每年所收租利除納糧
祭外餘銀悉行生放以為公項其法未嘗不善

但所收租利自應為合族婚喪贍貧濟急之用乃
江省淳樸之俗亦鮮賙卹之事而好事者據此為
利微嫌小忿莫不憑恃公資以為訟本誑上誣下
告訐無休更或圖謀風水占奪巒林詭立祖名擇
族中之狡黠者冒名混告一切盤費食用皆取給
於公祠狡黠之徒藉以為利甚至平空唆訟託稱
打點名色恣為誑騙以飽私橐刁訟之風所由不
息也夫子孫建祠置產本以報本崇先乃反為健
訟之資其弊由於公產不為公利而適以啟覲覲
者之心應通行飭示凡公租所積槩令增置公產

歲收所積除完糧脩祭外其餘擇令族正副經管
凡族中有喪不能葬貧不能娶以及一切應卹公
事槩以公項量力賙給族中遇有訟事槩不許指
此為用則公項皆為義舉而風俗返淳矣

一抗租霸種業不由主之俗宜禁也查業戶置田收
租完糧其餘以資食用佃戶出力耕種完租其餘
以資贖養事本相資情關一體起耕另賃權由業
主此主佃之通例也唯江省田畝獨有田皮田骨
之分而南贛撫建等府為尤甚揆厥所由因

國初鼎定當兵燹之後地畝荒蕪貧民無力墾復率

係名人佃墾墾戶開荒成熟未免需費工本遂世
代守耕故在業主為田骨在墾戶為田皮業主得
買其田骨為大買墾戶得頂其田皮為小買業主
止管收租賃耕轉頂權自佃戶業主不得過問若
欲起佃必須照還原費工本刁奸佃戶輒恃不能
起耕遂逋租不清歷年積累動盈數百石田主催
之不應起之不能不得不鳴官究追而地方有司
又未免以業富佃貧量追了事究之應得之租十
無一二現在各屬類此之案不一而足查田皮田
骨名色相沿已久固屬習俗難移但田皮起于工

本而工本究有成數應請通行飭示凡佃戶有抗租至三年不清者即將所欠租穀照時折價抵作工本如累欠不清逾于工本之數者即許業戶起佃另賃無許佃戶仍藉工本田皮之說強行抗佔違者以佔耕論倘佃戶額租無缺而業戶額外勒加指為逋欠者一并論罪庶主佃兩無偏競而爭端可息矣以上本司各就地方情形據實詳陳是否可行統唯鑒擇

請通飭印員相驗之法詳

無議得瑞州府詳請通飭印員相驗屍傷眼同屍

親驗明即取屍屬輸服甘結以杜妄控一案查人命全憑檢驗少有疑似未明則兇徒狡展屍親捏控訟師刁唆棍徒挾詐弊不勝言故律載告訴人命正印官于未檢之先即詳鞠屍親證佐兇犯實招以何物致傷何處立為一案詣驗之時即執定要害致命去處細驗其圓長斜正青赤分寸果否係某物所傷公同一千人衆質對明白各情輸服然後成招何等周詳明切凡以重人命慎刑讞也但江省各屬檢驗屍傷未嘗不當場訊供比量分寸較別傷色然明練諳習之員究不多得其間察

驗未明率速開報者徃徃而有以致驗後翻控案
 難速結者比比如是如毆傷皆有血塵自中而外
 由深漸淺傷盡之處皆有塵脚洗寃錄所謂如雲
 霞如雨脚者是也此蓋生氣所凝自然而著如係
 死後裝傷則痕跡板滯全無塵脚故曰屍傷以塵
 暈為主今各屬檢報毆打屍傷每有止開青紅紫
 赤顏色若干分寸而並不開明有無血塵者則與
 裝傷無異矣又竹木鐵石傷迹各有不同大抵竹
 則微露節痕木則整長無節鐵器多損傷及骨血
 塵深重色兼紫黑磚石則圓而不整尖而三角器

械各別傷既不同即一械之中方員扁楞亦不盡一循跡而求要難支飾今各屬檢報屍傷每有止稱長濶若干或圍圓若干而形跡率未深求雖稱傷仗相符其實未嘗較別也又持械闖抵毆傷則形迹長寬截傷則形迹圍圓乃有報稱毆傷而其傷則稱圍圓若干寸者報稱截傷而其傷則稱長幾寸寬幾分者且針刺芒扎其痕即有分許徑一圍三則圍圓已至三分乃有報稱他物毆傷圍圓一分幾厘者至跌磕所傷仰跌則傷在合面仆跌則傷在仰面左右側跌則傷在一偏乃有報稱一

時跌磕而仰合左右皆傷者又傷有連及如傷在
眼睛必及眼胞傷在牙齒必及唇脗傷在腎囊必
及腎子乃有止報眼睛牙齒腎囊而不及眼胞唇
脗腎子者則形迹分寸究未詳確也至自殺之與
被殺自勒之與被勒輕重懸殊全憑傷迹推究大
抵自刎者志在必死其口合齒咬緊眼閉或微張
而上瞪兩手拳握臂曲而縮傷口起手重收手輕
若係被殺則口眼閉手微握刀口無起収輕重之
異若不逐加分晰而率稱刀傷一處長寬若干分
寸則自殺與被殺幾無別矣自勒者兩眼合唇開

露齒左右手多自把繩頭被人勒死則口眼開手散漫身上或有按捺揉撲傷痕若不細加分別而率稱咽喉繩痕一道交匝若干則自勒與被勒幾無別矣至覆檢屍傷尤關緊要蓋肌體浮傷已無可驗惟憑骨殖而人之一生平時磕撞毆打負重着堅傷皆在骨故檢骨傷痕尤須辨其新老大抵老傷其色青黑而黯新傷則紅暈而潤若不察其新老但見有傷即為兇據是死者之冤未雪而生者之冤復成矣類此種種以致傷迹未明而屍親訟棍乘隙滋詐因之翻告不休現在延案難結轉

輾委審委檢者率由于此誠不可不為道飭應如
該府所請嗣後印官遇有人命呈報到案務遵定
例親詣屍所眼同屍親兇犯人等驗明本屍被傷
若干處所執定要害致命去處或現於肢體或傷
入筋骨分別顏色圍圍長短實在分寸當場究明
是何傷仗致傷比較確切復逐一指問屍兇人等
質對明白親填屍格除取件作並無增減匿漏甘
結外並取屍親當場同驗傷痕實係幾處並無隱
漏結狀一并入詳通報如印官仍有糊塗驗報及
檢驗不公抑勒屍親具結情弊察出嚴叅如屍傷

已明而屍親刁措圖詐者據實詳明聽候察究分別治罪再所取屍親之結止須聲說實係眼同驗明或金刃或手足他物兇傷幾處空樣其下手正兇確係何人致傷兇器確係何物自應官為詳鞫不得一槩勒取屍親結狀致滋擾累如此則兇犯狡卸之端可絕屍親誣捏之弊自除矣本司更有請者屍當暑月原易發變然發變處所皮肉浮軟而色多紫黯被傷處所皮肉堅貼而色有血瘀原有分別故屍首有少經發變而仍可驗視者地方官憚於臭穢每見少有發變即稱腐爛無憑相驗

以致其屍復遭蒸刮之慘亦未可之應請通飭嗣後暑月相驗或屍身偶有發變而屍親報告傷處無多不係虛怯處所有迹可尋者仍須細驗不得槩請發檢至鄰邑代驗原以速相驗而免腐變乃鄰邑多有託故推委廷不即赴及雖經赴驗而視非已邑事務草率了事者相應並請嚴行通飭如有玩命率混者一體叅處再檢驗無名病故身屍雖非重素但屍骸淺埋露暴雖經標名後未見有屍屬認領者或係告示開載未明以致屍屬無憑赴認亦未可知請并通飭嗣後凡相驗無名病故

身屍一併查明該屍肢體有無癢痕瘡痣及偃僕
痛跛禿頭瞽目等項一併詳細開示廣召似亦不
無少裨本司因慎重命案起見不揣瑣褻縷陳是
否有當統乞 憲臺裁示遵行

稽嚴河道議詳

查得贛州至省一帶河道奉 憲行令密訪地方
有無不寧營汛有無疎懈是否大盜劫殺攫財傷
人抑係溜賊誘客謀財害命作何巡緝防微之法
悉心妥議詳奪等因遵即密諭沿河之南臨吉贛
等府并移兩鎮及水師營一體訪查議覆前來均

稱所在地方並無大盜劫殺攫財傷人亦無溜賊
誘客謀財害命情事即聞有聞船鼠竊塘汛聞風
旋即救援亦無不出接應敢於踈懈之處本司竊
以自贛至省河道千餘里保無宵小竊發以為商
旅之累則巡緝防嚴之法誠不可不預事講求今
准兩鎮及據各府縣議稱大抵不外督率弁兵晝
夜巡查及禁止民船孤泊夜行俾挽宿汛所以為
稽防之法本司復查贛河一帶均設有塘汛墩臺
稽查防禦原有專司但汛兵中未必盡屬勤謹之
人則怠忽偷安或恐不免而船戶客商又惟以趨

趕程途為事或遇風水之便入夜不止任泊孤洲
以圖自便亦所必有應請照兩鎮咨議再行通飭
沿江防汛務宜實力稽防以靖盜源如有怠惰偷
安分別革治併照南昌等府所議一應客船不許
夜行及停泊並無塘汛處所所過塘汛遇夜攔阻
查明該船印票即與掛號將票留於塘汛徹夜守
更防護黎明給票放行並嚴飭汛兵不得藉端需
索留難如此則客船過往皆得稽考每夜皆有防
護宵小益知斂迹而商旅可保乂安矣本司再有
請者稽查雖責嚴於汛兵而弁員之督察地方官

之稽查尤不可不密應并移營轉飭各汛之端管
弁負仍不時親詣各汛往來稽查以防弊急沿河
各縣如南昌縣則有市汊司巡檢豐城縣則有柿
源司巡檢清江縣則有清江司巡檢泰和縣則有
花石潭巡檢萬安縣則有皂口灘頭司巡檢俱係
逼臨河岸皆有巡查地方之責其無巡檢專管處
所即令該縣以時酌委佐雜不時巡查凡遇河道
內一切匪船及無號漁船并飛梭絲網等船俱就
近報縣查明發落則塘汛益見稽嚴而河道益加
寧謐矣

請以馬快改正捕役議詳

查議得捕役之設所以稽緝奸匪根拏盜賊為地方第一要役况江省州縣竊匪時有報案頻聞尤不可不急加整飭俾額足力充官不乏于差遣役不困于衣食而後可以循名而責實查各州縣向設有馬快一役原以專司緝捕之事此即額設之捕役也祇緣後前地方官多有因仍弊習率以馬快專司差遣奔走之勞而緝捕之事則另設捕役一項崙司跼緝日久相沿忘其所自遂謂捕役額無工食而為捕役者徒以一身羈役既無以為父

母妻子之養又無以充口體服食之需而遠差廣
捕往返需資探線跼踪勾求需費地方官雖有捐
給之名大約名多實少此小而勒索事主大而秦
縱分贓之弊所由日熾也雍正十二年間奉 前
憲常深察諸弊飭司查議經司查得各屬馬快率
多責以差遣之勞不諳緝捕之事然奔走公務亦
地方官必需之役或難盡汰惟民壯一役新經裁
定各邑自五十名至三十名二十名不等伊等原
有防緝之責而現在充應者率係地方游手或衙
役子侄藉名補教操演訓練不過敷衍具文防緝

之事茫乎不辨是以請將各州縣裁存民壯每十
名內汰其老弱及不任差使者三名卽選慣捕補
數此選補之役尙司緝捕舊存之役專司防護則
大邑可得慣捕十五名中邑可得九名小邑可得
六名原屬一時權宜之計俾各勤其責各効其能
庶帑不虛糜而事歸實在遵蒙 前憲批允飭行
此抽撥民壯之始也自是各屬有遵照抽撥者然
亦有仍請以馬快專緝請免改撥者亦有酌量改
撥以補不敷者俱以各就地方所便辦理究亦未
始畫一遵行也今臨江府仍請另設經制捕役不

知馬快原係捕役即為經制今以馬快專司差遣
而欲另設捕役請動公項此各省所以屢格 部
議之不得已而議以別項役食勻給不知同為窮
役豈得損此益彼若以州縣養廉捐給又斷斷不
敷而民壯復現在議裁更難調劑是諸法皆為未
協 憲檄詳明早已垂鑒及此可謂洞抉其微矣
本司細加裁酌竊以各屬額設馬快八名原以而
司緝捕現在各縣多有遵行者是循名責實捕役
一項應以馬快全充各縣額設八名果屬遴募詔
捕諒可不誤差遣請通飭各邑將現在馬快通行

點驗有不諳躡緝者即行革除另選慣捕充應務
足定額俾之專司緝捕除躡緝盜賊及管解真正
命盜酌量僉點外其餘均不得派以雜差凡有一
切差遣及護餉押犯防護地方等項仍宜照舊酌
留民壯俾供奔走則責任可專而法行永久矣如
八名之外各縣果有地廣素繁必不足用者則酌
量添役二名或三名費既無多即于各役中勻給
每名不過勻減錢許亦可不慮偏枯矣如此則事
歸畫一不必紛紜抽撥又不必另設工食于緝捕
之法更覺清釐應否如是理合詳候 憲臺核示

以便通飭各屬一體照辦另取捕役花名清冊報
案存查本司再有請者額給工食僅足敷捕役衣
食之資若巨盜積匪遠緝廣捕盤費等項勢難責
其自備州縣身任地方既不能留心弭戢于先而
承緝不獲且繫考成則盤費一項自應州縣酌量
捐給其果有需費過多州縣難以獨捐者許其一
面差辦一面將實在需用數目詳明府司酌量于
罰贖內請行撥補在州縣既不致苦累而捕役工
食有資遠緝有費然後考其勤惰約之勸懲草其
姦私繩以法律將亦無可藉口矣緣奉飭議事理

是否有當伏候核示遵行

請嚴藉稱犯病延案之弊詳

竊照承審一切

欽部重案均有定限人犯患病雖有扣展之例原指正
犯要證而言其餘案內牽連證佐間有患病原不
得一例扣展乃江省承審案件各屬多有以案證
患病請展者原案尚未招解是否要證既無憑懸
定且有一犯未愈一犯復病轉輾請寬甚有報病
之後竟不報痊迨至屆限查取職名始以案證患
病未愈為辭更有請俟愈日方行起限者是案已

逾限不特無審結之期反無起限之日似此任意
違違案件於何得結况一案之內牽連犯證多人
徒以一人患病而致全案拖延更非所以速案件
而杜延累也但犯證患病既有扣展之例若槩不
准扣仍按限揭叅則州縣未免得以藉口若一任
因循坐使

欽部重件成年不結更恐為懈惰之吏長冗關之風似
宜亟為立法以杜弊端應請嗣後一切重案除正
犯患病驗明是實斷難解審者照例扣展外其餘
證佐人等遇有患病凡係案內牽連並非必須質

審之要證槩不得朦混請展其果係要證或另有
干犯賊罪亦應將現犯逐一先行確審如衆供已
明即應速為審擬將現犯轉解亦不得藉此稽延
其或確係要證因病難以質鞫正犯恃無指據混
行狡展及本身另有干犯賊罪必須審擬者亦飭
先將現犯確審備叙供情將如何必應質審緣由
詳明以憑核扣其案內牽連人犯審明實係無辜
分別先行保釋總不得因一犯患病致將全案延
擱如此則藉病延案之弊可除而無辜亦免久累
矣除一面通行各府轉飭遵照外但恐積習相沿

或仍有視為具文者理合詳請 憲臺核定批飭
以便移行一體通飭庶各屬益知所凜矣

請立行店聯票詳

竊照商賈挾本貿遷歷經險遠止以博錐刀之末
然貿易所至時貴時賤各有不同貨滯則稽貨行
則售放收出入惟恃行家為之評價歸賬而不法
牙行徃徃侵吞客本俾之經年坐守本息皆消燼
厥所由總因客商將貨經行發店後一時收價不
清不能守候即以現價重復回徃經營而行家即
乘間自向各店私收各店以發貨原由行主故亦

照給不疑迨客至催交業為牙行侵費奸牙計無

所出因之償後那前移彼清此積漸既久累客滋

多一朝敗露行主則棄行潛遁客商則本利皆空

成年告訐追給無期即竭力催追究之十不得一

此實行家之通病客商之積患也本司從前設有

合同聯票之法今各行家各置二聯會票凡客貨

由行兌店即將客貨若干議價若干三面填于票

內中用本客本店圖記花押為憑買賣各執其一

訂期清楚至日店家合票發銀如無合同對驗店

家槩不許發如有無票私給者槩不作準店家有

負欠逃匿惟行家是問本以杜行家私收侵騙之
端然未經詳定雖暫時循行猶恐地方官不能實
力頒佈而行家因不便于已或置而不行或久而
仍廢現在客商被騙告案紛紛欣逢 憲臺撫蒞

西江剔利除奸恤商綏遠德溥意周因敢不避瑣
褻繕具票式呈電可否仰請 憲恩俯准照行本

司另當發給簡明示式并票式飭發各州縣傳令
各行家將告示各刷木榜一面釘掛行首俾客商
投止一目了然一切貨賬皆立合同對驗發銀仍
令地方官以時稽察庶 憲威所及令行風肅而

行家侵吞之弊可除遠商異賈仰戴無既矣

請頒弭盜之法四則

竊照江省負江依湖綿谿延嶺西接湖湘南連交廣為商賈必經之地帆檣薈萃之區五方投止良匪難分而地方浙情皆竄偷生衣食為艱遂恣剽竊兩年盜劫之害雖覺無多而各屬竊案每邑或十餘起數十起不等甚有至百十餘起者本司職在刑法責有專司追胥賞罰非不勤嚴而新舊聞積迄未清查每滋悚惕夫安民莫先弭盜凡任地方之責咸所稔知究其弭盜之法不過追捕比緝

于未獲之先審擬發落于已獲之後惟是奉行具
文而已竊惟憲臺前秉臬三吳議詳弭盜八法
寓寬大于精詳切實周密整剔無遺伏讀原議有
云欲竊盜之少莫如先治可以為竊之人欲人之
不為竊其上則安置之使必為竊其次則約束
之使難于為竊又其次則防詰而懲創之使其知
有犯必懲一犯而不敢再犯舉綱挈領所以塞其
源而遏其流理無踰此惟生齒蕃庶游食滋多安
置之道驟不易言是在良有司因地制宜安全教
化苟以革其非心以期久效誠非旦夕可幾而現

發各案所以約束而懲創之尤爲目前之切務所謂疾則攻之也本司謹就原議各條細加詳酌除江省現行相符及地方不同難以槩施者不便請行外其有現在急須推行各條合行詳列仰乞推廣施行

一 如嚴究窩線一條內開捕役分防坐汛某處有賊某人無不真知灼見惟欲藉以養家故將有名之賊收入戶下縱其爲匪坐地分贓始終徇隱或追比緊急則擇一賊少者破案塞責其賊多者久已擻爲已有牢不可破矣以故歷來賊案賊少者易

破而賊多者反不能破初犯之賊易獲而積賊反不能獲皆此故也等語實為洞抉隱微各省捕役悉坐此弊今坐坊雖奉例革除而捕役猶是積匪猶是秦縱分賊勢難革絕應請一體飭禁嗣後獲賊到官應即問明該犯係何捕所管嚴究捕役如何包庇有無行竊別案如肯據實供出量寬屢犯之罪即將汛捕按律定擬地方官嚴加根究務于獲犯文內取供入詳不得以事涉衙役便有徇隱各捕預先首報准予免罪再能將戶下之人全數蕪解除寬已往外地方官仍量子獎賞其窩頓積

賊之人指引線竊之犯亦于獲犯時嚴加根究並
取供入詳審實即不同行均各追賊治罪至于買
贓之人果係偶然誤買照例免罪如係買過幾次
者即屬明知故買應各照律坐罪不得寬縱凡屬
盜賊之窩線平時必有匪人往來必有贓物變賣
地方族隣不難物色應曉諭地方士民如有此種
可疑人戶許即指名報官密鞫審實並予獎賞立
案以免仇恨如係挾仇誣扳審明究處如此則捕
役秦縱之弊可杜而窩線蔽引之風亦戢實亦清
釐盜源之一法也

一、如核實贓物一條內開事主開報失單彼時賊尚
無踪何從定其虛實迨至獲賊到官認竊之物大
半無着非盡由事主之浮報賊犯之花銷其捕役
乾沒于起賊之時尅勒于被獲之後者正自不少
在賊犯以贓少則罪輕縱不圖得贓亦圖免罪捕
役明知賊犯止圖免罪將必抵死茹刑不肯直吐
竟將贓物穩歸囊橐等語從來失案多無全獲之
贓無不由此是竊取在賊者容有追獲之期而婪
取在役者永無給主之日應請一體飭禁嗣後無
論強竊案件凡供出贓物即委佐雜等官查起或

贓物無多另差的實衙役查起其承緝之原捕不許入門奉委官役公同事主查點當衆登記則起贓無乾沒之弊至于獲賊之後務將所失之物逐一嚴究不得任其狡供花銷又有事主失賊無多恐官役不肯認真緝賊故意浮開者無非急欲破案情尚可原遞問虛誣殊覺過當且事主恐蹈浮開之罪不肯實供徒稽案牘反難歸結嗣後獲賊到官審明賊犯果無抵賴即照所認實數問擬如事主所失之物確有可據而狡賊贖刑不承者雖贓物尚無着落仍將賊犯照原數問罪不得輕信

議減以開尅贓之大弊若事主有意多開藉端逞
刁挾制官長誣扳平民仍將事主問罪至于估計
贓物若將贓單交與書役估計勢必有意減估爲
賊犯輕罪尤無以服事主之心應令傳同事主經
紀當官三面照時估價凡傳喚事主估贓領贓止
宜懸牌出示隨到隨理不得出票致滋需索拖累
如此則賊真罪當竊賊無倖免之奸捕役無中飽
之弊而事主邀獲賊追贓之實惠矣

一如認真追贓一款內開除起出原贓當時領回外
其餘贓物自當比追給上但賊犯多係無產無業

之人發落以後尚應追贓保釋既慮遠逃收禁又多苦累大都交捕管押事繁州縣有一捕而押至十數人者賊犯別無餘貲若非復竊憑何還贓在竊新還舊一案未了又增數案已屬非法况捕役之家豈能供養多人則縱令復竊勢所必至而于前案之贓終屬無補更有事主因見押追不能怠情日赴印官稟比而窮賊僅餘皮骨追亦無益徒令事主僕僕守候累月經年亦非良法等語查盜賊贓物無完原應嚴查家產變賠給主之贓如果無產可追例得詳請豁免亦應一體飭遵嗣後竊

盜賊私無完卽查明該犯如有家產押令變賠若果無追卽取族隣甘結照例免追將賊犯及早安插不必交捕押追徒爲惡捕縱竊之計如此則案件既免無益之拖延而事主亦免無益之守候實爲省拖累而杜縱竊之良法也

一如嚴比緝捕一條內開州縣捕役每處不過八名額編工食有限家而日用出而盤費在在取給于此一經提比往來有費打點有費計無所出惟有庇賊縱竊而已捕取之賊賊取之民以故提比之法愈嚴而報失之案愈多也且州縣捕役寥寥數

人雇人代比有名無實若令親身應比今日道提
明日府提應比尚且不暇何暇緝賊若竟不提比
在州縣之精勤者固不乏人而怠玩姑息不肯比
追者亦復不少終非良法等語查比捕之法雖現
在各省通行分別提比不過循行故套究屬無補
事宜惟廳員親比一法事簡而意詳法不虛行政
歸實在並請一體遵行令捕盜之丞倅每年按季
定期預行該管屬縣至期親赴各州縣督同印官
傳集正身各捕按冊查明各名下緝案之大小獲
賊之多寡分別嚴比勒限緝拿不許僱人代杖不

許藉詞脫卸每季赴比一次其餘月日仍聽州縣隨時自行責比毋庸分解道府徒多繁擾在廳員按季一臨舟車之用無多而捕役歸一責比枝節之費可省若廳員到縣隨行之書差藉端需索仍行查究廳捕亦照此實力比緝以收實用如此則責成專一上下可無提比之煩而捕役得專緝緝之事矣以上各條準諸律例切中時宜合之江省現在情形實為簡當用敢列詳仰請 憲臺俯准通飭實力遵行府廳州縣及捕巡各官果能實心遵守一二年內地方盜案日少民生寧謐即詳請

獎叙以示鼓勵若安于怠玩仍致失竊頻聞者即分別請究以示懲創于地方民生裨益匪淺再原議內獎賞緝捕一條實為馭捕督緝之良規但江省現無可支公項容俟另行籌定再議詳請合併聲明

買牛經牙并私剥斃牛議詳

查議得臨江府通判胡繩武具稟條議民間買賣牛隻務經牛牙交易倒斃牛隻毋許開剥等款遵奉檄行查議本司伏查竊盜耕牛贓跡易露耳目易彰利在速售其速售之法大抵賣于鄉僻村農

者十之二三賣于開園宰戶者十之七八蓋鄉僻小民務貪賤價竊徒盜牛急圖脫手若無窩宰之處則惟有牽至孤村僻壤減價求售然究屬有跡可尋惟一歸宰戶則片刻成交逾時滅迹盜風未息實因私宰之徒朋比作奸誠有如 憲臺明示者也然私宰棍徒明知事屬干禁徃徃托稱牛隻老病以開剝救本為由遞呈佐雜衙門求批准判于是批一宰十公然出之于市恣行鬻賣是私宰之不可而官宰之矣可知開剝斃牛實為盜宰賊牛之源也則嚴買賣禁私剝誠為杜私宰而戢盜

風之一法應如該通判所稟嗣後民間買賣牛隻除彼此識認者應聽自行買賣外其有外來面生不知姓名住址之人務經牛牙交易不得私自承買各邑牛牙俱自行設簿先期送縣鈐印凡有民間買賣牛隻即查明來歷將毛色齒角并買賣姓名住址備登簿內方許用價售買牙人照例取用倘有不遵致買賊牛者發覺之日將買牛之人照知情故買賊贓律治罪牛牙不查來歷及明知賊牛代為貨賣者發覺即將該牛牙以窩贓治罪如牛隻來歷明白而牛牙故行指勒照把持律重杖

則買賣兩清而贓牛易于究察矣至該通判請將老斃牛隻即令掩埋無許開剝一條雖足以杜私宰之源但查殘老病斃之牛原不在例禁之列且皮筋骨角咸為有用之物或係真實農民牛遭倒斃若不令其開剝稍救牛本暨行棄置亦覺堪憫但奸徒藉倒斃為由乘機影射開剝好牛以及宰殺賊牛之虞誠宜立法以杜弊端請嗣後民間凡有倒斃牛隻務須隨同保隣擡縣驗明查其實係農民已牛取具保隣甘結即令在城開剝發賣務于兩日內賣完不許聽其擡回開剝亦不許延賣

多日致滋弊端其有並未擡驗擅自開剝者一經
察出即係斃牛仍以私宰論罪保隣不報分別科
擬如此則奸棍難以影射而真正農民亦得稍補
牛本矣

命案檢明即許掩埋議詳

遵查州縣一切命案身屍既已報官檢驗則傷迹
已明自應即着屍親領埋一面照例通詳以免經
年暴露乃江省詳報一應命案相驗之後均將屍
棺封交地保必俟結案後始行給埋歷久相沿儼
同成例本司細察其由揔緣江俗囂訟每多驗後

翻控而州縣之諳于檢驗精確不移者又率不多得故初檢覆檢往多互異慮其翻更于後故不敢給埋于先實亦習而不覺其非者也查律載告訟人命印官于未檢之先即詳鞠屍親証佐克犯實招以何物致傷何處立為一案詣驗之時即執定要害致命去處細驗其圓長斜正青赤分寸果否係某物所傷公同一千人衆質對明白各情輸服然後成招本屬周詳明切並無屍棺俟定案後方行給埋之例惟是屍親居奇翻控難保必無是以乾隆五年經本司詳定印官詣驗屍傷眼同屍克

人等當場比較確切指問屍亮人等質對明白即
取屍親當場同驗實係傷痕幾處並無隱漏甘結
入詳現已通飭各屬遵奉是屍親當場同驗既已
出具並無隱匿甘結則更毋庸俟定案給埋矣應
請嗣後凡地方具報人命州縣驗明傷痕除無主
屍身及屍親的屬未到者即着令地保浮屠官地
俟查闕屍親到案訊明給領外其餘無論謀毆及
自盡人命州縣官眼同屍親驗明即當場比較明
白着令屍親具結掩埋一面備文通詳飭審究擬
毋庸更待招詳定日給埋致使日久暴露既已取

結給領于先即或偶有另須檢驗之案亦屬間有
不難起土開檢固不便預揣日後之翻控而禁其
領埋于先也應否如是理合詳候 憲臺核奪

彙催各屬上行案件并造報日理事件議詳
會議得親民之官莫甚於州縣一切庶政咸所發
端新舊仍積日累日多全在精勤之吏以時清理
故州縣之理積牘如去宿草荒莽甫除新萌旋長
若不隨長隨芟安得不蓊蕪蔽塞江省各屬承辦
案件最重者莫如

欽部命盜然而遲逾尚少其餘一切自盡人命以及賭

竊雜案稽擱反多蓋內結之案初叅二叅處分攸
係猶知畏勉其餘一切外結事件則任意稽延至
于自理事件則更恃上司無可稽查一票差拘成
年高束書差因之舞弊訟棍由此生奸蔓延滋累
弊害百端江省雖不乏精勤之吏而闌慢偷安坐
此病者正復不少實有如 憲檄之明鑒也向來
本司衙門雖設有三籤立限催提之法而黠胥之
延捺本官之庇縱已成牢不可破之勢究等具文
無裨實政查州縣事件雖多要不出上行自理二
項上行事件逐件催提既不勝其煩且今日一牌

明日一檄有催無覆紛紜冗雜亦覺考核難施誠不若按月彙催之法簡便而核實也查各屬通報事件上批事件該管衙門俱有檔籍可稽應請嗣後凡內結案件已屆分限不解外結案件經兩月不覆者即彙列一單分別縣分件數有限期者開明限期每于月初行催一次該縣奉到上催即于五日内將某案已經審詳某案尚未審詳并聲明因何不即審詳緣由下列現在承行該吏姓名彙開一摺具覆原催衙門以憑察核次月彙催有前催未結事件仍行列入票首下開現催事件各屬

如有延擱不覆及案經兩催不詳者即指名稟提
經承究處惟提究承行久成故套必須專其責成
方能法在必行請嗣後凡府州縣申上一應文書
無分詳驗俱于年月坐衙下列入承行姓名無論
經承貼寫摠以承行為是遇有遲玩即指名行提
州縣奉到行提不必另備文批止用職名一扣後
列經承姓名差押到省隨赴號房投送立時傳稟
隨堂責處以免文批投掛之煩書差捺索之弊摠
期每提必到每到必處不許本官代為請寬書吏
憚于提究不必官催吏而吏即催官更無遲擱之

弊如此則州縣未完事件按月可考不特上司不致紛錯難稽而州縣亦得循序趕辦法簡意詳實可遵守再州縣自理事件雖有每月造報之例不過擇其已結者聞報二三件其已准而不審已審而不結者究竟無憑查核且竟有全不具報者則直視為具文矣本司伏查州縣准理民詞每月約不下百十件少亦不下五六十件江省每月造報俱將事由讞語全錄并有將原被呈詞供看全錄者若將一月准理詞件全行抄報院司道府冊籍煩多實有不能盡報之勢夫造報自理事件原

以考州縣之勤惰本非定案件之是非今因求詳而反畧何如用簡以致詳應請嗣後造報自理事件除不准者毋庸造入外其已准者止須開叙註語原被姓名准理差拘月日及已結或因何未結緣由按日逐起挨填有准後和息者亦一體開造至原被呈訴審讞槩不必錄入末後摠開一月共准詞若干件已結若干件未結若干件至次月造報仍將上月已准未結事件開一摠數于下註明某日審過某案仍未完某案共若干件下開續准事件照前分別登註限于次月初五以前即為造

報如計程久逾者亦即指名提承責處有遺漏者一體提究則自理之案孰為已准未審孰為已審未結何日准理何日差拘州縣有無怠惰書差有無捺摺燭照數計一目了然矣其間容有審斷未當者或經告發或行訪聞自不難另調全案查核原不在造報之煩簡也詳定後統請以二月為始如各州縣中仍有隱飾漏報者察出照例分別記過叅處如有拖延滋累者從重題叅本司更有請者小民控告強半皆戶婚田土之事庸猥之地方官每視為無關緊要混批鄉保地隣以為省事不

知州縣所視為無關緊要者皆小民痾痛迫膚奔馳守候者也究之鄉保地隣各袒所親扛帮捏覆之弊生而案情淆亂牽累益多所謂省事者安在地方佐雜且不得發以民詞而保隣則公行批發亦非所以重民務也查乾隆四年定例地方官如有濫批鄉地者即將該州縣題叅照印官將地方一詞訟不行親訊曲徇情面批發佐雜例降三級調用煌煌

功令而州縣習焉不察殊干嚴例請嗣後如錢債逾時未楚地界偶有未清等項實係細事許着地隣

查處限日帶同原被公覆外其餘一切爭控事件
槩不得混批鄉保人等致滋弊延違者照例叅處
似亦清積習而杜牽累之一法也應否如是理合
擬具冊式詳候 憲臺核定以便轉飭施行

收買莽草議詳

議看得瑞州府詳議收買莽草一案奉批確議本
司竊以政貴得中首在不擾江省地卑氣濕山僻
之區鬱熱所蒸多生莽草其毒甚烈愚夫愚婦忿
激輕生者每多採食故歷經示諭保甲不時芟除
復奉 憲行嚴飭保甲拔除不淨地方官奉行不

力分別懲處仰見保全民命之至意惟莽之為物
根枝延蔓叢生最易其在谿畔田間固可不時祛
拔惟深山邃谷之區人迹既鮮旋削旋萌實難保
其不無滋長保甲即屬農民春耕夏耨之餘復重
以芟毒之責踈怠者固不容寬或實係山區搜除
不及遽干刑累亦覺堪矜此該府所以有收買之
議也但既議收買而仍限以一月不盡先行嚴責
並限日勒繳莽草百觔十日不繳即行枷號地方
官有服莽命案三次即詳揭請叅雖以慎重民命
起見不妨稍嚴但知人謀害他人不救及地保失

察盜賊匪類罪止一杖而此則重以枷號地方官
因自盡命案而即惟叅處未免迫急轉覺難行竊
以毒人惡草所在多有江省除鼠莽而外又有黃
藤鈎吻大茶葉斷腸草山砒草之類率皆叢生山
谷而莽草一種以其可以毒除菜虫民間反多收
蓄無莽之處則另用砒石之類可見立心自斃之
人似不必專在服莽但地方官既明知其為毒人
之物斷無任其蔓生之理惟以錢論勸收買村野
愚民利于多得當毒苗新長時度其無幾轉恐欲
俟其長茂而不即芟除更或彼此爭割反滋事端

究非中正之規應請仍遵 憲臺原批飭行地方
官嚴諭保甲不時拔除如果實心搜拔自將所拔
莽草送官繳驗地方官量行給賞以示鼓勵倘仍
有服莽致斃者查明實係保甲陽奉陰違芟除不
淨即將保甲擬杖以懲地方官實係奉行不力報
案頻聞查明平日功過附詳聽候察奪其該府所
請收買及限日交草并地方官有服莽斃命三案
即行揭叅之處應毋庸議緣奉飭議事理應否如
是理合詳候 憲臺批示遵行